



**TERTIB ACARA KEBAKTIAN  
PARTONGGOAN KELUARGA SA-GKPS RESORT POLONIA**  
**Jumat, 27 Maret 2020 (Model B)**



**1. Votum - Introitus - Tonggo**

- P: Pasirsir hita ma dirinta laho mamuji pakon pasangapkon Tuhan in!  
Ibagas Goran ni Naibata Bapa, pakon Tuhan Yesus Kristus ampa Tonduy Na Pansing, Sitompa langit pakon tanoh on.
- K: Amen.
- P: Roh ma nasiam hu-Bangku, nasiam na loja anjaha na boratan, ase hupasonang nasiam. Haleluya.  
Halani ai, dodingkon hita ma idop ni uhur ni Jahowa Naibatanta in, anjaha pabotohkon hita ma hasintongan-Ni.
- K. (*Mandodingkon Haleluya No. 302:3*)  
Haleluya isombahkon na porsaya hu-Bamu.  
Bai arian pakon borngin, idodingkon hu-Bamu.  
Haleluya, haleluya, idodingkon hu-Bamu.
- P. **Martonggo ma hita!** Ham Tuhan Naibata na itanda hanami ibagas Jesus Kristus Tuhan nami. Puji-pujian ampa tarimakasih do talup sombahkononnamu hu-Bamu. Iparmudu-mudu, iparorot, iramoti, janah ipasu-pasu Ham do goluhnamu, mambahan boi hanami marhasadaon pakon Ham. Tonduy-Mu Na Pansing in ma na tongtong mangkasomani hanami, ase margogoh hanami manjalohan hata-Mu. Ibagas goran ni anak-Mu Tuhan Yesus Kristus, ipadas hanami tonggonami on. Amen!

**2. Mandoding Hal. No. 7:1-2 "Porini Dong Marribu Hali"**

Porini dong marribu hali pararoling ni sorangkin,  
Boisni gogoh ingganan ni mamuji Naibatanta in.  
Ibaen malas ni uhur hin hi norhon ni pambaen-Ni in.  
Ai lambit ondos ma sorangku, bai ujung ni dunia on,  
Sagala jolma arahkonku, mamuji Naibata tongtong.  
Talup do gok ni uhurhin, hubaen pasangap Tuhan in.



**3. Mambasa Ayat Bulanan: Psalmen 133:1**

**4. Doa Syafaat (Salah sada anggota keluarga)**

**5. Mandoding Hal. No. 9:1-2 "Tuhan Naibata"**

Tuhan Naibata sai parorot Ham.  
Daging pakon tonduy nami on ma na pinindo nami;  
Sai pajorgit Ham ganup hanai.  
Jesus Ham botul, Raja na bujur.  
Ham paluah tonduy namu humbani pardousaonnamu;  
Pasu Ham tongtong ganup hanai on.



**6. Ambilan:** 1. Martonggo paima ambilan.

2. Mambasa teks ni ambilan:

**Teks Ambilan Sibasaon: Sepanya 2:1-3**

- P. Roh ma nasiam martumpu anjaha bahan nasiam ma partumpuan, ham bangsa na so mambotoh na maila.
- K. paima hona usir nasiam songon dogdog na hinabangkon, paima sogop bani nasiam ari panringison ni Jahowa.
- P. Pindahi nasiam ma Jahowa, nasiam ganup na toruh maruhur i tanoh on, nasiam na mangkorjahon parentah-Ni, pindahi nasiam ma hapintonor, pindahi ma toruh ni uhur, andohar iondingi nasiam bani ari panringison ni Jahowa.  
(janah iujungi marhitei hata)

P. **Jalo hita ma Hata ni Naibata ai marhitei-hitei doding na gabe pangakuanta.**

**K. (*Mandodingkon Haleluya No. 18:1*)**

Hatamu ale Tuhanmu, arta siharganan ai.  
Sai palongkot bai uhurhu, ulang lang hujolom ai.  
Anggo seng be sijoloman, Hata na madear ai.  
Aha ma na baen onjolan, ni haporsayaonkin.

(Padaskon/mambasa ambilan)

**Hita haganupan na hinarga ni Tuhan!**

Teksni ambilanta on aimu golpa-golpa ase marhamubahon niuhur bangsa ai, bangsa na isobut bangsa na so maila (Ind. Acuh tak acuh). Janah marhamubahon ni uhur ai, adong do batas akhirni aimu: sanggah dong ope panorang paima jumpah arini Tuhan in. Halani Anggo domma jumpah ari ai, lang adong be na boi ibahen hita. Lang adong be panorang padearhon diri ronsi paubah uhur. Halani ai do ase dilo-dilo nabi Sepanya, ase roh ma hu lobei ni Jahowa martumpu. Tapi lang sibar tumpu-tumpu sonai hansa, tapi martumpu laho pataridahkon na dob mubah hauhuran ni sidea. Maningon roh do bangsa ai mamboban haganupan panlanggaron ni sidea janah tongon-tongan ma mansopotkon haganupan pambahenan, pargoluhon na lang iharosuhkon Naibata. Ambah ni ai isuruh do sidea ase mangindahi toruh ni uhur, ulang gijang paruhuran, jangan mengandalkan apapun yang ada di dunia ini, untuk mendekat kepada Allah.

## Kuria na martumpu i rumah ni bei nuan!

Anggo roh martumpu maningon dong do tujuanni, aimo laho mamuji/pabanggalhon anjaha pasangapkaon goranni Tuhan ma. Ase makna ni namartumpu ai manangihon hata-Ni, janah mangkorjahon harosuh ni Naibata. Nini bani bindu 1:4-5, "Pagostonganku do tanganku mangimbang Juda, ampa mangimbang ganup pangisi ni Jerusalem, siapkononku do humbani ianan on goran ni Baal ampa goran ni malim-malim ni naibata na legan, ronsi halak na marsombah bani bala na i langit i atas tayub, ampa halak na marsombah bani Jahowa, tapi na marbija homa bani Milkom." Sonai ma goluh ni sidea na mangaku bangsa ni Naibata. Marsombah hubani baal, malim-malim ni naibata na legan, ampa bani bala na ilangit i atas tayub, sonai age mar-dua Naibata. Daoh do goluh ni sidea humbani harosuh ni Tuhan, marhitei namangkorjahon hagigi ni Naibata. Ambah ni ai lang adong homa kepedulian dompak hasoman na legan, tanginan ma sidea bani ajaran na pakahouhon marimbang parentah ni Tuhan. Ganup ari pitah mansuhuni hisap-hisap ni daging ampa harosuh ni uhurni do sidea. Anggo lang ra sidea paubah uhur, ringis atap uhum ni Naibata sai ondos ma bani sidea bani ari ni Tuhan songon na sinobut ni nabi Amos (Amos 5:18-20).

## Hita haganupan, hinaholongan ni Tuhan!

Ase marhitei ambilan on iojur do hita ase totap mamuji Tuhan, ibagas hapintoron pakon toruh ni uhur. Holong do tong uhur ni Tuhan mangidah hita age pe gok panlanggaron asal ma totap hita manandai dirinta, hahuranganta, hagalekonta. Pindahi hita ma Jahowa janah hagoluhkon ma hapintoron ase aman goluhmu anjaha ipaluah sanggah paroh ni ari paruhuman ai. Roh ma hubani Jahowa ibagas toruh ni uhur, mansopothon ganupan salah pakon lepaka, na lang iharosuhkon Tuhan in marhitei namangajamhon idop ni uhur-Ni.

Tarlobih sonari hita ma partonggoan i rumahta masing-masing, na gabe hataridahan ni bentuk tanggungjawabta selaku warga negara na riap pakon hasoman na legan laho memutus mewabahni virus Corona, na mambahen bulinsah ganup bangsa. Tontu ulang ma mangorui semangat pakon kualitasni ibadahta bapa, inang, hita haganupan. Tapi bahan hita ma partonggoan i rumahta masing-masing ai gabe panorang martumpu, laho manangihon hata ni Naibata laho patorsa-torsahon goluhta. Porsaya ma hita bahasa Tuhan tong-tong do setia manjalo, mamintori, pakon mangidopi hita bani ganupan keadaan. Domu hujin pitah hapintoron ni Naibata do napaluahkon hita. Amen!

(Penginjil Wanita Narsinta Damanik)

## 7. Mandoding Hal. No. 372:1+4 "Sai Pasiat Tuhan Jesus"

(irik patumpuhon galangan iondoskon hu bendahara sektor)

Sai pasiat Tuhan Jesus roh hu bagas uhurmin,  
Tar paima-imma Jesus bogei panuktuk-Ni in.  
Sai pasiat Tuhan Jesus das hu bagas uhurmin,  
Nuan ari pari dopan ulang sompat salpu on.



Bere goluhnami bai Jesus, ai podas do salpu in,  
Sai pasiat Tuhan Jesus, bai uhur na loja in.  
Sai pasiat Tuhan Jesus, bai hubagas uhurmin,  
Nuan ari pari dopan ulang sompat salpu in.

## 8. Tonggo Galangan – Panutup – Pasu-pasu

- P. Hata-Mu do rigapan bani naheihu anjaha panondang bani dalanku.
- K. Sai horjahanonku do rosuh-Mu, Ham Jahowa.
- P. Hasaksian-Mu do hubahen pusakangku sadokah ni dokahni.
- K. Anjaha seng anjai manirpang ahu hu siamun barang hu siambilou.
- P. Bamu do Ham Jahowa hata hagoluhan.
- K. Huungkab do uhurhu laho mangkorjahon aturan-Mu.
- P. Mandompakkon Jahowa do haluahon banta.

## Martonggo ma hita mangondoskon galanganta hubani Tuhan Naibata!

Ham Tuhan Naibata Bapanami na i nagori atas, tarimakasih ma hatahononnami Bamu, halani holong-Mu na banggal in na gabe hagoluhannami. Bani panorang on iondoskon hanami do hu-Bamu, na ipatumpu hanami on gabe galangannami hu-Bamu. Sai jalo anjaha pasu-pasu Ham ma galangannami on, laho pabolagkon harajaon-Mu pakon pararatkon hata-Mu i dunia on gabe hasangapon-Mu ibagas goran ni anak-Mu Jesus Kristus Sipaluah hanami. Amen.

## Riap ma hita martonggo marhitei tonggo na niajarhon ni Tuhan Jesus hubanta:

Ham Bapanami na i nagori atas, sai na papansing ma goran-Mu. Sai roh ma harajaon-Mu. Sai saud ma harosuh ni uhur-Mu i nagori tongah on songon na i nagori atas. Bere Ham ma bannami sadari on hagoluhan ari-ari. Sasap Ham ma dousanami songon panasapnami bani dousa ni hasoman na mardousa dompak hanami, Ulang hanami bobai Ham hu parlajouan. Paluah Ham ma hanami humbani pangangou. Ai ham do simada harajaon, pakon hagogohon, ampa hasangapon sadokah ni dokahni. Amen.

## P. Jalo hita ma pasu-pasu humbani Tuhan Naibatanta:

Idop ni uhur ni Tuhanta Jesus Kristus, pakon holong ni atei ni Naibata Bapa, ampa parsaoran ni Tonduy Na Pansing ma mangkasomani hita haganupan.

P+K. (mandodingkon: Amen..... Amen..... Amen!)

